

摛藻堂四庫全書薈要

集部

欽定四庫全書叢書要

集部

陵陽集卷六至四

詳校官助教臣謝登雋



欽定四庫全書薈要卷一萬五千九百七十一

集部

陵陽集卷四

元
牟
嶽
撰

律詩七言

劭農日漫成

白髮紅顏烏帽翁年年從爾覓年豐爭看漢詔來身畔
便覺幽詩在眼中且喜畦秧三日雨莫愁花信幾番風
我今亦是惰游者不稼而禾愧食功

景定甲子理宗嘗以顏曾傳道配饗下問詞臣

越咸淳丁卯昉以曾子子思升侑孔庭益推
本先意也先臣所被宸筆藏之私室會軍學
撤舊廟崇新閣願得摹刻其上而某固未敢
也府教張君遂詩以成之後之觀者將有考
於斯文謹用韻以謝

在昔前朝帝問頌龍樓當日正承顏曾思參侑褒崇后
堯舜相傳密勿間邁駿先猷昭若日於皇吾道重于山
老臣獨抱烏號痛不及臨雍扈從班

藻有嘉魚首自頌師儒樂育士懼顏宸奎恍若從天下
傑閣崇成不日間要識道原觀泮水坐令文物盛黔山
熙明殿下槐龍舞便合歸陪講讀班

荷花辱於淫邪陷於老佛幾千載自托根濂溪
而後始得以其中通外直者儕於道而近世
魏鶴山又推本周子之意取澤陂之詩所謂
碩大且儼者歸之君子焉明倫堂後新池驟
着花教授遂見之詩且有取于周子香遠之

句寄興遠矣因次韻

道中何物不生焉頃刻能開碧玉蓮根脚好時花發越
源頭活處水漪連喚醒佛土從前夢細繹陳詩最後篇
霽月光風真灑落千年此意後誰傳

和張教雨詩

占雲日日問何如物意焦卷重可吁微灑人皆憂未濟
積誠我自愧中孚滂沱幸已符先兆罷極行看獲上腴
此事相關情正切吾儕初豈事誇諛

試院和李提管韻

聖世旁搜盛武宣幾人捨乘嘆牴朋武成宜取二三策
稽古還誇數萬言亢棟此時唯恐後着鞭他日竟誰先
空釜相對真堪笑半夜魚龍已變遷

無黨為東岡賦遠遊余卧病空山聞而壯之和
韻為別

鬢絲梅雪兩鬟鬟底事征車又指南自是曾遊習蛙鼃
不妨小住話魚蠶操怯中歲情良苦兼來平生分所甘

若有書來訪生死白雲多處是吾庵

次韻無黨留別

濤波萬木撼新秋却笑茅廬似葉舟我但蕭疎眠頸尾
君方矍鑠向壺頭早涼已喜無殘暑老別當須似壯遊
黃木扶胥最奇處想留句子待浮洲

和劉朔齋海棠

人物當今第一流以花為屋玉為舟曉粧未許褰幙看
夜醉何妨秉燭遊錦里宣華思舊夢黃州定慧起新愁

何如歸伴徐公飲穩結一巢花上頭

和善之寄遊何道二山

行盡千峰日未晡齋餘扣檻喚紅魚百梁扶棟神輸巧
一鐸鳴簷樂出虛那得詩情陪島可但誇山色勝衡廬
老禪趺坐渾無語案上旁行幾葉書

兩人相對說蠶叢蒿櫓堪嗟滿故宮忽見畫圖如雪外
不知身世此山中餘生纔寓一梯米獨往殊欣六尺蓬
寄得詩來何處覓南湖蒲稗沒鳧翁

送李仲賓同知

一別丰儀十載間
新春再見為開顏
鷄林傳去詩如錦
龍節歸來鬢未斑
白日絲綸端可待
平分風月早須還
此行已滿英雄彀
同上烟霞紫禁班

詩韻識所感

聞汝相隨入翠微
歸時晚色已淒迷
櫻桃為喜筠籠重
燕子休嫌茅屋低
我老恐妨兒輩樂
新詩欲繼古人題

年高自覺摧顏甚送客何嫌過虎溪

尚記當年薦寢園百官分賜荷恩寬帶青絲籠空餘夢
搔白頭人苦不歡詩老誇稱作崖蜜野翁驚看瀉銀盤
南山見說紅千樹鳥雀兒童任入闌

次韻王寅甫

共惜餘春賦式微莫教當飯失苗藜行行直度南雲北
得得還尋東院西白髮已應隨日長黃鸝更與盡情啼
試哦小雨輕埃句絕勝前邨滑滑泥

和陳無逸九日

揚鸞設醴奏絲桐
九日臺頭詠渚鴻
宣遠風情雖曠代
淵明霜氣直橫空
卧龍自命初非過
戲馬當時未足雄
莫笑東籬太岑寂
南山長在醉醒中

萬事真成一繆悠
西風節物若為酬
鴻飢未覺他鄉遠
菊老誰同此日愁
已洗眵昏看句眼
更扶衰病費丹頭
吟情笑我今何似
廢覽寒泉澁不流

和張老山辭免運同

曾驅海若傲波臣底事年來苦乞身徑為蓴鱸稱退掾
要將蓑笠伴玄真流空素月光難掩過雨青山老更新
祇恐未應閒袖手鹽梅鼎餌正須人

和李侯九日

自愧羸併在井湄頗思時復一中之平生殊欠題糕字
今日堪憐對菊時烏帽已忻新得酒白衣誰似更攜詩
吳興太守真三絕爛醉輕教玉笛吹

幾回九日九江湄杖屨從容信所之下溪遠尋觀獲處

東籬想見醉眠時共陪今日吳興守猶記當年己酉詩
我亦平生知所慕飄飄衣袂任風吹

賀張老山得代

富貴方來本不期湖山徑去豈無辭衆咻直欲齊為語
一笑姑存鄙與譏難辦求田還問舍且教入務并尋醫
幡然強為招延起從此岩阿爛蕨薇

別趙子昂

粉省星郎蹋曉班暫隨使傳走人間荊州利得習鑿齒

江左今稱庾子山君意頗為尊菜喜人情爭羨錦衣還
但憐老病匆匆別白髮如何更可刪

送蕭子中

誠齋手摘千巖藁詩律清森近代無仍世科名香未歇
諸孫文采蔚相扶橫經為喜臯比穩覓句何妨鶴骨癯
會見蕭生起東海幾年志抱一時攄

春雪

一冬只辦作嚴寒剪水飛花事竟難閉戶不知春意動

撲窗忽覺雨聲乾頗聞萬事正雲集何處一蓑如畫者
但喜畦蔬得蘇醒從今小摘有餘懽

送羅漢臣

向曾平步上仙鰲拂袖歸來氣尚豪自有西山堪拄笏
不妨右手且持螯凌雲載酒渾如夢泛雪回舟也自高
顧我餘生復何事閉門三徑削蓬蒿

過洞庭山書湖中所見

欲談舊事恐悽然誰遣奇觀墮我前鴛陣萬屯湖為黑

冰鬚千尺水皆懸無多風色似天相阿那人家疑地仙
更有一般堪羨處嫩醅綠蟻醉無眠

送趙蘭臯教杭學

一似彭城向穎時重開講席整冠綾青衿喜得新師範
白髮能言舊尹釐獨冷定應非熱屬衆芳況復異凡姿
不妨且作回翔意直上搏扶亦未遲

送种南仲主簿

六客堂前翠竹屏雙谿館下碧麟生遍經此老行吟處

可是常行簿領人吏為求蠶覓休假官因祭竈請比隣
也知矮屋難淹滯且與空山作好春

題用拙齋

柿林園裏伍文黨金谷叢中石賈塵漫說愚溪詭當世
苦將巧宦目他人何如杜老幽居處一似無懷太古民
說道書齋名用拙可存吾道樂吾真

曩在長沙有遺以石山今舊物雲散此石以堅
頑獨存漁莊為賦九芙蓉之句遂以歸之目

為壺中九華致其悵望

當年持餉自襄東共載尤憐翠色濃莫向壺頭疑薏苡
要從華頂看芙蓉諸郎自是階庭秀此物聊堪筆硯供
却笑仇池無與伴圖中悵望九竒峰

餞留忠齋丞相

并序

趙清獻公自衢過永嘉曾文清公自越過姑蘇皆以
八十之年就養子舍此東州盛事也大丞相忠齋留
先生視兩公名德同鄉里同壽年同而東閣府判將

迎安輿以踵芳躅邦人士日夜望者余以老門生敢援前比賦小詩贊公之行

尺尺柯山路未賒人生迎養最堪誇續茶山集過吳下
耆戲綵堂來永嘉八袞高齡忻子舍同鄉盛事屬公家
邦人莫笑門生老日日花間望小車

予與會孟同游古心先生之門死生契闊今見
其十年前與仲實詩帥初既和予亦繼焉

擾擾人間萬事塵舊交無奈白頭新此翁固是同門友

今日真成曠世人千里賞音知絕識九秋落木見橫陳
也休頻把遺篇看說到銅人更愴神

和虛谷韻簡唐月心

平生自分只虞毗況是而今一槁枝江左何人譚太極
洛陽有客賦新詩物情於我真疎矣吾道非公誰與斯
未必梅邊聊索笑微言好與共參之

錢陳正則學錄長城

本翁十載郡博士司鐸官清亦未遑暫屈吳淞湖海氣

來看陳檜雪霜姿近家聊喜片帆穩遠業當為萬里期
老我柴扉看岑寂不妨時寄畫溪詩

再和虛谷韻

肯隨世事事夸毗得得來尋霜雪枝苔曲新添漁隱話
陵陽別論派家詩卜隣已喜同王翰到處猶能說項斯
不是晚來投社去杖藜兀兀欲何之

和梅遇二詩

除却壺中日月長不知何處是真常等閒鉛汞自生死

從古薰猶更臭香糞掃袍邊覓鍾呂步虛曲裏換伊涼
何當月朗風清夜喚出胎仙舞一場

行止非人所可為疎慵何事不違時已驚夢裏鷄鳴早
翻笑人間鶴到遲刻曲船回空此興洞庭飛過怕渠知
依然身世溪亭上售用新添五首詩

高賢孺厚齋使君之令子自番來雪訪明親舊
此誼甚古歲辛亥余識厚齋金陵通守之舍
堂陪朔齋劉公飲海棠下俛仰四十五年追

念悽然

厚德流光報必豐當年齒稚已竒童蘭芽秀擢孤根內
華表驚呼一夢中宵向陳人論世好絕知新句有家風
海棠花下看鍾蔣說着今人念此翁

和王梅泉黃靜齋載酒問花

逃瘧形容兀似槎誰尋獨樹老夫家高人早擅無雙譽
佳客爭看第一花已為義尊成酩酊更誇信筆寫葩華
斑斕小草真兒戲得借餘光亦所嘉

吾五十年間未嘗一杯自壽汝曹所知者今乃
力營甘旨為七袞慶事出創見欲深避去復
不可使汝曹他日懊恨亦如吾者小詩答渠
勤意丙申正月十五示諸兒

七十新年未盡窮香醪滿泛饌尤豐便同五鼎為吾養
汝有雙親勝迺翁一念自能通造物諸孫更與振家風
花燈璧月今何夕春在親情笑語中

十六日謝郡官兩學及鄉里朋友

七夕空餘永感情
南園養病閉柴荆
一朝破戒為兒子
四坐合併表友情
地主每能容柯柄
天公特為放新晴
餘年得此今多幸
白髮傾欹一醉成

十七日謝趙子昂孟能靜及諸親友

兒將白髮共嬉娛
敢意高軒訪敝廬
七袞年齡同絳縣
諸賢詩句過黃初
菌芝那解出枯朽
冠蓋便能傾里閭
爛醉休須問生理
貧家今有百車渠

送楊興府

細語當年別後春驚心寓縣尚吹塵濁醪易貰新豐酒
衰俗難逢舊雨人君似伏波當益壯我幾南斗不能神
合併未幾忽忽去魚鳥蒹葭誰與隣

大水後得雪

便涓飛洒又何佳得得來尋貧士家破屋青燈纔一黍
荒園老樹忽千花酒逢寒夜饒偏貴詩出窮人矯轉誇
兩月兒書渾未到定應行脚更天涯

蕭條籬落勝於邨還徑人稀早閉門過眼風花纔一瞥

到頭石筍只雙蹲何妨歲惡詩仍好那笑爐空火自存
笑詠車斜微雪事諸君本本又元元

再和

飢年得雪意殊佳天亦終憐田父家是處連雲畦宿麥
一時積水散空花預占餅餌真堪喜若比瓊瑤未足誇
我正坐須來歲杪夜中踏甕喜無涯

正思覓食遶諸却咄咄今朝雪塞門屋角空困飢雀噪
床頭敗絮凍鷗蹲分無醜醜能相熟賴有符貲僅自存

堪笑少陵窮不死區區苦欲問黎元

三用韻

雪中饒有百般佳却似綢繆困約家老病自應餘菜色
風騷猶未合梅花背暄擬向田翁覓面少時聞兒女誇
可是年來四不出也隨箏箸傍天涯

慚愧長髯市入邨送詩踏凍到衡門未愁顧兔千毫禿
持晉陽烏三足蹲我亦欲尋安道去人應共怪阿先存
界天雪嶺依然白更憶當年李仲元

四用韻

寄食於人苦未佳從來逆旅便為家四時長是併無粟
一夜偶然燈有花雪夜又寒誰復料物中惟老不堪誇
卷書危坐時相望不覺西南各一涯

五十年前三尺雪匆匆振杖下荆門坐驚蒼苒吳楓換
長憶輪囷蜀芋蹲覆局還如一日事劫灰能有幾人存
新詩讀罷令人感轉瞬看看又歲元

道士號庭梅為賦此

苦把庭梅劣野梅。庭梅元自野梅來。肯辭台鼎當年貴。
直向丹田內景開。山意濃時還耐看。道根孤處更深培。
玄機參透何分別。猛拊闌干一笑回。

送張剛甫廣德學正

桐川咫尺路平寬。華檄春風白髮歡。教育兼全三者樂。
起居頻報四時安。的傳何況自諸老。
謂實事本脊遠業豈徒榮。一官從此江東有新句。寄來應對暮雲看。

十一月朔冬至

曾僖再閨孰為偏五載之終似遠然辛亥徒為章首歲
上元直在太初年是年上元甲子朔旦始正周正泰正未從元凱叩長歷
且效少陵吟短篇一線閒愁隨日長形容空老此江邊

餞余好問入燕

炎歎漸已轉涼颼想見湖亭送別時發軔功名初得意
聯鑣賓主總能詩昔人猶自薦佳客今日何憂乏已知
最是人生急三釜高堂白髮數歸期

和徐容齋正旦

想見新年試筆時風流應不減丘遲歸來燕子元相識
落盡桃花若未知何事蘭亭脩禊樂便懷墨客感秋悲
湖山勝蹟無由共禪榻茶烟老鬢絲

和趙景程提舉見招

高標照我髮星星百尺樓邊一寸莖樽自不空如北海
客非善飲類公榮四筵驚起聞豪唱五斗拚教解宿醒
何事詩筒來較晚且容湯粥煮榆羹

再用前韻益坐上有九老繡幃

耆英圖障爛如星勝似屏風映紫莖洛社便如同此樂
商顏未必采其榮戴花劉九徒歌舞當局溫公豈醉醒
試問諸賢閒得否熙豐一鼎沸於羹

次本齋韻

七十八春華髮老幹旋文鼎力猶堪品題人物多成傳
管領溪山盡屬銜了不安排方是適本無全缺又何慚
誇傳析國睢陽冠五字新詩落枕函

十月能靜飲于海棠花下唐同知適至因言昔

在漢中十月海棠亦開用韻

貳車曾上漢中臺十月海棠無數開萬里相逢曾識面
雙睂埽靜更傳杯高情共惜薰支暈歸夢還思灑瀝堆
客去主人應卜夜不妨喚取燭籠來

和除日聞鶲

門前車馬氣如雲鶲噪驚猜意甚馴別歲風光從草草
報人消息喜頻頻當家金印君先得明日椒盤我自親
共樂高堂稱筭壽安輿迎養趁垂齡

送鄧善之

尺一俄聞有急徵
風雲奮迅在南溟
正如蜀客懷鉉筆
未羨鴻都寫石經
此事惟須一艮卦
今朝頓見兩文星
情溝婁畔藏書去
人在金坡白玉局

送人赴宜興教授

催喚沙棠港口船
門前龍象聳初筵
養親始願家良近
事道中年志愈堅
美俗一新吾禮樂
高賢多羨此山川
不妨且為坡翁住
却上玉堂陪衆仙

陵陽集卷四

欽定四庫全書

薈要卷一萬五千九百七十二

集部

陵陽集卷五

元 犀 獻 撰

律詩七言

次韻李千秋中秋

節物詩情總索然，漫將梨栗當盤筵。
堪憐永夜空樽月，記取衰翁斷酒年。
十日尚留花影在，兩鉢便作竹根眠。
分明破戒緣佳句，免使兒童誚禁烟。

癸卯人日送李千秋還杭

喜聞罨畫初回棹便擬共公吟過春何事客鄉還送客
今朝人日更愁人風吹杯面梅花老路轉裙腰草色新
只恐西湖留不住重來好為活疲民

失題

篇章何事等嬉游尚想揮毫剪燭秋從古殺青徒自苦
只今醉墨可能求忽傳鶯立沙頭句又見鴻歸天外州
襍研去來須猛省不由自己更誰由

歲在丙辰元日立春是時先人守當塗郡齋賓

客雲集皆用元祐八年東坡和王仲至奉少游詩故事所謂省事天公厭雨回先人笑曰天公省事今乃多事耶今三十有九年矣追念感慨小詩聊記當時笑談之語

憶昨姑溪歲丙辰老仙元日去班春當家句子頻催客
省事天公却笑人紫鳳天涯今已老泥牛歲首又還新
笑談誰記當時語獨立東風倍愴神

和任東津山長

吳興學法徧諸華吾道元無通與遐今日誰能闕下馬
古人猶自醉先茶宵開燕豆驚流俗共喜臯比得當家
入手新詩惟重拜頡頏那得並飛霞

和汴教耶律伯明

翩然來自舊京華歷數山河不謂遐往事已空惟重黍
玄談未了更澆茶南遊句好俄驚座東道情深未憶家
也欲衛州門外去一聲長嘯入煙霞

新城羅氏棣華堂

中和偶向此枝聚友愛當知吾意同十世共居尤盛事
一家三代共春風試看華萼相扶處正在閨門載翕中
昭諫而來名節偉更添新記與無窮

寄昌化孫梅泉

揮手秦稽信宿然未行俄已兩週天雲緘尺素懽開後
雪輶雙溪恐墮前高誼誰能似孫宰舊題應復記蘇仙
何時布韁青轡去摘野芎苗古寺邊

送李雲在學錄

橫經之暇即吟詩三載如常匪激隨聽而不知官獨冷
看雲自與意俱遲翬飛鸞宇生新散鵠立儒衣動去思
還恐西湖難久滯此聲梁楚已先馳

次韻九日寄史推

弁有山兮水有湄登臨捨此復何之髮疎帽脫狂嘲後
雁過江涵感慨時盛府主賓俱好事消城風雨苦吟詩
人生自可行樂耳劍首功名但一吹

次韻寄史彥明

等閒看盡弁衡毗旁郡聊從捧檄馳候管乍披新定志
郵筒忽見故人詩君方清絕行明鏡我正催頽搖槁枝
為喜綵衣還膝下椒柈趁得頌花時

答朱鄉林見寄

天目羣仙帝所毗別來引領但神馳分明輸與鄉山老
活脫吟成玉局詩論舊驚心幾甲子扶羸笑覓一筇枝
如公再合幡然起休戀春先笋蕨肥

次韻李侯喜雨

誰似當年召信臣天教來此活疲民水鄉怕旱相傳古
甘澍隨東總是春坐看豐登成樂歲只將惶悌對神明
已聞宣布形歌詠賓主殷勤用意新

謝李侯枉過

鳴騶窮巷忽相遇其奈將迎窘步何每望故都身不羽
欲賡新句硯空磨籃輿端復為公出泥飲唯應說尹多
却是旁觀工指點若為公錦雜漁蓑

長兒授館於杭每休暇過仲實家相與譚經析

理間則飲酒賦詩為樂今閏秋十四日會於
復軒相視而笑曰好天涼月即中秋况今歲
兩中秋乎迺留飲劇論夜參半蟬聯不休情
愈郁穆予聞之甚喜因為詩寄之

共飲方酣月滿樓劇談無寐露侵裘此宵此景應難值
吾婿吾兒亦罕儔情誼渾如同一姓風流不負兩中秋
絕憐老子婆娑甚破戒何當大白浮

和陳無逸木犀

秋旻金氣正高張併作西風一夜涼何處杯中無白墮
如今扇底有黃香自慙老杵如犀禿却笑春花為蝶狂
勝賞清吟兩奇絕吳山橫過即仙鄉

和仲實秋興

金陵吹暑頓然清聞早空庭一葉驚拄頰偏宜對朝爽
揮毫正好賦秋聲鏡中鬢短休煩鑷壁上絃間不受檠
志士由來多慷慨何如百囀聽鶯鳴

黃元靜飲客蒲蓮海中殊勝絕

扁舟徑入芙蓉國一笑俱非
龍纖人低拂柳陰偏障暑
活烹芡觜快嘗新小巾脫去我先醉大杓取來渠更真
啜醕數觥詩興發羨君越漾老精神

次姚子敬簡高司丞

西風小立對晴川冷笑人間目聖顛使事端因荔枝出
歸期休在菊花前平生謾說少陵老終日誰陪上界仙
應是杜中鷗與鷺詩情比舊更依然

王梅泉生日惠詩次韻答之

堪笑袁翁作計狂又隨箒箇到魚梁未秋早覺凋蒲柳
已老安能種豫章誰似讀騷仍飲酒有時贊易自焚香
梅邊有約君應記但愧年來久覆觴

白貢

致飾雖云責則亨含章內照乃為真離明外附天光發
良止中存道體純玉質未雕虹貫日素功後繪物生春
也應笑我玄猶白不比羔羊正直人

次韻

大海相環宛一洲浮漚乍起已千秋三壬笑向人間世
四癸時尋物外遊我輩安能知許事平生未若樂斯丘
開窗翠竹時相對更說諸餘總謬悠

送程晉輔長和靖

傳家氣脉固深長挾策來登和靖堂南渡金聲元不泯
西庵草色可能荒要知持守為涵養好把精微重發揚
共喜慈幃得甘旨他時遠到未渠央

趙君寶宣慰別三十五年矣末由再晤近張倩

仲實轉似西湖詩圃乃知吟嘯湖山之樂歟
為五詩奉答

南屏環擁翠雲堆誰遣精廬特地開祭酒先生甘隱遜
燃藜太乙忽飛來胷中礧磈五千卷門外芙蕖十萬裁
白日竟拋妻子去羣仙攜手上瑤臺

右南屏書院

橋園亭畔市多塵麴院橋邊境轉清山色湖光精舍敞
筆床茶竈釣船輕奈何一字不堪煮且與三賢相並行
笑問壽藏何早計不妨更學趙臺卿

右西湖書院

毅齋大老除

闕

名節尤偏無所尊曾是臚傳第一唱

却留衣付外諸孫挹接柳汁初承渥稱泛霞觴共拜恩

尚記吾家多夙契何當握手得重論

右鄭夫人傳

伯子堯夫豪傑人四時佳致四時春靜能觀動一機活
會復乘元千古淳造物生生還化化世情故故又新新
不妨長向亭中醉自覺沖融氣味真

右四時春

平生知舊一李友別後長關白板扉偶有客來孤鶴起
也無人覺小舟歸儘渠俗子頻相惱只恐仙禽未肯飛

莫笑釿琴并煮鶴醉眠林下兩忘機

右小舟歸

孤鴈

如何苦作斷腸聲度盡關山失弟兄萬里宦鄉誰是伴
單栖半夜若為情嚶嚶每嘆衆人薄落落孤將一意行
只恐影沉湘水後更無來者繼高名

贈陳東洲

散髮披襟頗自由野麋見客忽驚投新詩生怕將愁至
博學何妨與藝游未說天邊金彈子試尋城外土餽頭

不然且學伯倫醉荷挿相隨死便休

題陸起潛皆山樓

醉翁朝暮四時景誰遣描摹入此圖喚作皆山真箇是
擣來到處與之俱也曾住客相陪否亦有清泉可釀無
更喜一般僧侶舊高樓百尺俯塵區

送屠存博教授溧水

直道方心古所難任渠俗眼笑儒冠子龍有屋猶黃壤
老鄭無籧漫冷官一片湖光清客署三州鼎足屹書壇

只應翠綠迎人意歲月功名正好看

送郭南俞教諭

試把溪堂舊譜看三年苜蓿守酸寒吟肩祇自初來瘦
寢尾方知細滿難憂患可能期學力功名終不誤儒冠
到家莫作多時住趁取秋風送羽翰

絕句五言

賈節菴胄夏暑越修塗過我苔雪呂情誼甚厚今

聞闕大節不可復見而骨肉消息訪

問難真相對殆感慨不能為懷青燈夜語誦
少陵夜闌更秉燭相對如夢寐之句意甚惆
然其歸也兒曹以此為韻賦詩道別余亦作
馬衰老拙惡姑寫我懷且以卜後期云爾
君留劍水尋我卧弁峰下十書九不到思君無日夜
一朝忽在眼喜極生悲酸老淚如撒菽淚盡氣亦闌
事故不可料柯爛碁局更兩家骨肉內往往隔死生
英英君令弟介烈夙所秉就死得處所我意復何恨

吾女去二禪何處吞聲哭忠孝果何辜神理諒未燭
君能為置後此意不可忘燒燒峙頭骨正好玉其相
自言勤教督燈火與之對泉明定不孤門戶期汝大
我為飢寒困坐遺恩義疎君固不忘我我愧當何如
連宵接軟語共說夢中夢聚行時未多歸驂忽已動
別餞別尤苦輾轉那得寐後會倘可期握手三致意

拂秣天馬圖

赤手謝銜轡踏蹴驪九衢健哉此女子果勝大丈夫

和漁具十絕

買得五瀉舟江湖落我手呼兒下筈去此事渠能了

舟

卧吹月明裏龍吟鼉打鼓別是一家風荻花擺頭舞

笛

披時響蕭騷卧處堆傭仄傲然烟雨中安知有睢澤

蓑

輕圓兀其顛不受暑雨厄時將篷外挂旋轉卷七澤

笠

裊裊不自持何以制沈犧聊懸一鯈餌鯨鱠未可狎

竿

彼已苦其密此猶患其疎歎呼試新罔一舉雙白魚

網

熒熒枯蚌中急雪灑不滅西風明日晴雙花為儂結

燈

呼風忙趁魚一片如掌大且等後船來過湖猶早在
帆
登登遠還合聲從何處起魚走潛深波禍在深波裏
柳
即此是瘦冰醉棹舞波面何似宮亭湖為我覓如願
楫

贈薛東湖

抱疴蓬廬下白日背我馳我生已如此天命復奚疑

悠哉東湖水不迎亦不隨相對澹無談可以樂我飢

希年初度老友王希宣扁舟遠訪夙誼甚厚覩

以十詩實用淵明采菊東籬下語五章云每

歲思親不持竿蓑我幾欲廢詩雅蓋深知予
心者讀之淒然輒爾和韻

行年似啓期顏髮日夜改此身尚我累橡栗時自采
古人歌既醉其中有五福如何憔悴者忍飲但餐菊
有酒巾可漉無酒榼自空但懷停雲友相望各西東
九日把壽酒時節無差池我生秋已老菊荒而崩籬
扁舟過寂莫十詩繼騷雅定是王弘孫猶記南山下
淵明六十三我已多數秋未死亦偶然神仙殊謬悠

平生遇初度何曾具盤筵感君知我意老淚更潸然
人生百年內榮華僅少選何似鷄黍約歲晚長相見
憐彼武昌柳搖落向江潭虛名竟何益斗北與箕南
淵明詠三士講學馬隊間斯道幸不廣石高姥廬山
溪邊釣船

莫出前溪去隨宜下釣鉤風波苦不惡鱸鱖滿船頭
方竹杖

此君久不見歲晚伴華顛直節要到底勿論方與圓

題東季博山園二十韻

是誰接藍染千條萬條碧我欲問東風東風澹無迹
輪囷肖天巧靈竅含雨意惟應野老知此是豐年瑞
雲卧不禁冷誤把岩扃觸翻動若木枝紅光被空曲
落落金彈丸飛鳥不敢下盧橘不到吳楊梅同過夏
行行西崦西暝色蒼然入芸芸各歸根我亦坐內息
綠醅春灑灑綠水煙渺渺百年散誕內空以愁自繞
倚闌發長嘯援筆記舊遊想見同來者俱非第二流
第

桃源逃不徹真境宛在目要令千載下知有古風俗

泉脈十字過石簾千里通汲來聊煮茗風味故應同

青青南澗芹雪消春已動如聞修廢筭岩半發流漣

窮鱗無處避網罟如雲密悠然釣臺畔袖手看落日

神仙好狡猾空飛萬里行石橋小如許鐵杖響彭鏗

捫蘿上復上未省所歷高忽與歸鴻值萬里一羽毛

冷石眠夏天冰室透毛骨所以安樂窩大暑苦不出

澄然蓄清渚百尺往往深不放寒漚發可以觀我心

秋寒

高
樂

山亭

石橋

南澗

小谷

桃源

此處若為關，自來還自去。中有無心人，不妨相伴住。

雲
關

都將千石危化作一林，雪盡日無別香。五月何曾熱。

林
葉

幽人讀書處，皎皎霜月闌。香影不可掇，高花在岩畔。

梅
岩

別來五百歲，於焉駐駛馭。吳市梅子真邂逅，亦神遇。

仙
聚

好著在眼前，世上少人覺。留此妙不傳，付與神仙著。

奕
仙

張敞畫眉圖

眉嫵臣罪小，君王一笑休。明日章臺路，便面越風流。

相如撫琴

不負百年心琴中托意深如何渾忘却猶費白頭吟

猿鹿圖

野鹿正周張猿投兩臂長由基方逞巧何似總相忘

胡孫圖

山果包已盡充然兩嘸中雄雌自相命槲葉老秋風

陵陽集卷五

欽定四庫全書
薈要卷一萬五千九百七十三

集部

陵陽集卷六

元 犀獻 撰

絕句七言

己巳秋七月不雨人心焦然迺戊午齋宿致城
隍清源渠渡龍君鼇山五神于州宅以禱始
至雨洒塵自是間微雨輒隨止旱氣轉深苗
且就槁要神弗獲某憂懼不知所出越癸亥
日亭午率郡僚吏申禱于庭未移頃雨大摶

旄穉呼舞皆曰神之賜也某既拜覲又明日
以神歸念無為神報者乃作送神之詩七章
以侈神功且又以祈焉

休休早稻已焦卷晚稻搖風更可憐枯盡百源無一滴
老龍何處卷雲眠

幾度看雲眼欲穿不應氣數總關天去年兵又今年旱
守也於民自寡緣

五神萃止足精神迅發風霆一欠伸能事莫嫌相迫促

門前多少望霓人

老火猶驕氣蘊隆
爐香爇罷日方中
片雲忽卷天河落
頃刻難名造化功

神祐恭惟及物深
中間感應妙精薰
要知應處還為感
終始惟當秉一心

眼前物意頗昭蘇
未省郊原徧也無
更覓洗車三日雨
普教大地活焦枯

龍輶欲駕已多時
父老遮留一日遲
秋菊寒泉何以報

精勤更寫送神詩

卷之二

都梁北鄉士多好學有向君敏衡者一日訪予語甚質氣甚夷禮甚度予心異之間為予言曰家故沅徙也今所居有谿實自沅來乃築室聚書其上以教子弟因以沅谿書舍名之而其亭則曰無加盖其地舊號無加莊以其東止於石西止于岝南止于路北止于泉也願有以發之予既為籀古書二頌而向君復

以所謂廉崖者諗予予聞此石傑立千尺實
稍厲峻削可敬可仰有類乎廉者頗思一至
其處摩挲此石以激哀懦而未能也乃各為
一解以謝焉

書滿精廬芷繞門門前流水出於沅夫君自得濂溪意
直向沄沄認本原

周子寓匡廬號濂溪者本舂陵故居也

右沅溪書舍

無加之義復何如解盡當年太極圖

朱子曰太極者猶曰舉天下之至極

無以加此云爾八面四方都恰匝更於止善用工夫

右無加亭

庶崖千仞孰能干一見令人毛髮寒可以人而不如石
我當為石共衣冠

右庶崖

予方卧病稅院劉君以畫梅堅索詩口占遺之
今年四野赤如赭安有吟情到此花何況病夫空百妄
只於真實認根芽

題德範第三香圖

水仙侑食老逋家更著江南小白花三雅如渠好兄弟
衆芳未許以肩差

次韻洪帥喜雨

礮車亭午作雲頭喜雨亭前黍稌秋但得人間甌窯滿等閒萬慮一時收

感孚妙處捷風雷造化於人豈遠哉見說商霖一尺字向前車馬待公來

遊高園用前韻

蟬聲繁喚客回頭依約疎僚去後秋不是先生新句守
一川雲錦費勾收

儘渠絃索輶春雷相對清風君子哉涼觀主人歸未得
不妨却許蜀人來

和本齋止酒

白家老瓦慣從游和氣如春不汝郵近日更誰嫌外酒
夢成燥吻吸青丘

羨渠痛飲日亡何一石如髡亦未多麴米春濃禁不撤
酒腸笑我本無它

聞公久矣空諸妄止酒真成一事無舊說蜜殊惟飲蜜

不妨試候小風鑪

生憎市酒赤如霞難效當年老阿嘉一任花前殺風景
破除舊賜小龍茶

酒名真一妙形容方法傳來玉局翁搖動天闕出瓊液
澄然不比小槽紅

病餘井臼不任勞欲飲無錢可是高一笑猶堪誰空腹
少陵詩裏學燒糟

送程茂叔

天涯忽送非常喜阿園班衣郎罷前話盡青燈十年事
床頭周易故依然

真成有子萬事足何況人生七十稀莫道梅花遙五嶺
頭輕月朗去如飛

贈羅竹山術者

此君乃肯與人事辯舌生風有竹山何似竹林惟痛飲
嗒然滅否兩相間

魚須翠碧都拋却重糈今居卜隱中門外有未能握粟

為渠滿意說年豐

鞶紋紙帳稻畦衲梢枯地鑪煨芋供此是人間真富貴
莫將輕易許渠儂

和陳無逸中秋風雨

身似浮槎何足絆家同墮覩不須看枉裁白髮三十丈
可奈青泥八百盤

病攻我劇聲摩壘月避人深目眯糠一盞濁醪如許障
諸餘不容苦思量

錢高仁卿農丞奉使還北

常平舊法最為良頗記中丞耿壽昌此意推行在人耳
肯教豐歛制低昂

好農使者慣經常歸路西風水國涼但使人皆歌美稷
故應此即是甘棠

別來五度見重陽草草賓朋共此觴聽得酒邊新句子
可人風味故難忘

裝輕路穩好兼程還向鷓班侶雋英自葉流根誰識此

老農摩腹送餘生

舜舉水仙梅五絕

橫出一枝誰與並
整青蔥佩立多時
窓明几淨好風日
移向此中渠不知

檀暉金杯兩擅奇
晚風併作一香吹
此中畢竟同還別
付與司南鼻孔知

雪椀冰甌薦茗時
蕭然相與對幽姿
一生肝膽何由俗
時有清風披拂之

當代涪翁有素評此花雅合喚梅兄玉宸殿上重差次
可是詩人許與輕

老逋久共梅同住好事誰令侑酒仙變化侯王等閒耳
不堪持到影香前

舜舉馬

常得奚官剪拂齊也思驟首一長嘶好隨便面章臺去
柳色如烟路不泥

秋江晚渡圖

晚來江上鯉魚風十里青山一望中自是欲歸人意急
等閒付與濟川功

夢會圖

并序

趙堯卿嘗夢東坡野服乘驢訪之顧室中書史環列
喜曰天下之樂無以加此他日又夢問以水仙王事
即答以茫昧語堯卿與斜川游稔而是時方補注坡
詩故心誠所感如此今翰林張周卿所記澄照德公
之事人皆以為異余謂東坡之精神無往不在而平

生喜佛言句流布中土歷劫不磨豈非澄照素知向慕雖亂離奔走結習未忘有以得之歟一以詩一以禪所趨雖不同而所感未始不同也樂廣以形神不接而夢為因東坡為之說曰心依塵而有夢夢覺之間塵塵相授數傳之後失其本矣豈非因乎信斯言也二會之夢東坡必他有所因使因東坡則數傳之後不當復為東坡故竊有疑于其說然澄照夢公時年六十有一而其壽至一百有十四則倍壽之語亦

幾矣正甫御史視澄照為同姓是宜保其圖而登其
壽二小詩附下方

覺來猶記舊儀刑跌坐無言月滿庭畢竟是因還是想
不妨重舉夢齋銘

洛僧加滿九十五也向香山畫作圖況是東坡曾囑付
壽年多似手中珠

題戚子雲五雲圖

一從鰲去波翻海夢斷蓬萊不可尋當日五雲依約處

有人掩卷自微吟

金南峰隱居圖

高哉千丈屹南端
路入層雲欲到難
試看幼輿岩石裏
人間爭似畫圖看

身在山中不見山
却因遠看更孱顏
煌煌三秀如堪采
拂石眠雲未擬還

四安道中所見

蒼涼初日破林霏
幾度言歸今得歸
兀兀籃輿續殘夢

門前兒女挽人衣

分明路入茶山去喚起昏昏嗜睡翁共笑翁來已差晚
珍芽秀甲老秋風

一溪百折渡復渡尋日如行糾篆中自嘆勞生欲飛去
琴高借我赤鱒公

何事區區外謀光五漿先饋豈其當儘渠爭煬仍爭席
物我而今已兩忘

生怕秋蟲稻把稀腰鎌爭出傍晴輝尻高首下泥中鶴

啄得黃雲盡始歸

狹路傾欹下澗隈
歸牛忽帶夕陽來
狂遮瞪視渾無奈
鳬仗誰人拽鼻回

紛惹多岐意轉猜
若為誤向此中來
平生不作窮途嘆
途若窮時一笑回

依約茅茨傍翠微
炊烟孤起半開扉
早禾趁日連枷闊
老莢爭風拍板飛

木瓜已過折山來
黃帕封林未敢開
想見白沙紅照裏

繡紋冷落見奇瑰

木瓜園入折山數里供進後方散賣土人取瓜埋其半于沙中以紙鏤花

貼上以溪水洒

之日晒乃紅

千顆豐融怕日侵
楮生調護貴於金
直須待折囊封了
方見冰霜一片心

薄酒三盃醉不成
雨敲疎瓦見分明
破衾判作空階滴
滴到乾時也解晴

聽得荒鷄第一鳴
吹燈發火飯初成
衣囊減盡渾無袂
又是蕭蕭帶雨行

崎嶇踏破布行纏負米擔鹽似蟻緣為羨生涯隨處足
五湖鯉菜范公船

人向長安渡口歸長安不見但雲霏只應白鷺曾相識
船到前頭更不飛

可是茅岡太無賴苦要錢足刺船行却聞官路相將近
便覺山輿陡頓輕

千山過盡又行脚慚愧道人看客勤裏得白雲欲相贈
一甌茶復白於雲

斧斤不貸老根株素節蒼皮委路隅憶昨此中逃午暑
前知愧不及堯夫

落落長松不計年輪囷枝幹欲參天流肪已化為神物
枉損蒼鱗亦可憐

姑溪小隊帶薰風笳鼓懼迎鶴髮翁三十九年成一夢
幾多陳迹淚痕中

每羨尚平婚嫁了恣游五岳可曾回也應未斷塵緣在
依舊桃包入浙來

支離病骨倦泥行擬向蓬窓睡到明繞鬢秋蚊故相惱
更求底物是親情

亭亭明月無人伴一意孤行天地間憐我扁舟連夜發
肯分清影到蒼灣

中秋有約竟須歸未到家時月已隨不合盡情看到曉
今宵殺漫雨垂垂

兒能忍渴留佳餚我亦開包得快梨自笑初無泥可洗
頹然還得醉如泥

歸途擬向城中去論舊翻驚人已非悵望敬亭烟雨外
平生謾說謝元暉

題羅御史詩

諫草詩篇好護持又吟蜀井竹西詩携將高節堂前去
題作雲蒼也更奇

丘詠涯

聖道洋洋陋百家就其淺矣詠其涯直須辨取槎乘去
未許當年海若誇

月軒

坐嘆冰輪吐復吞長風忽為拂霾昏塞開萬里無纖翳
到處人家月滿軒

題擇庵雲山圖

老圃畫裏也藏機雲抹前山凍不飛寸許塔尖何處市
扁舟臘日訪僧歸

約家性存

春風小語記懷岷二十年中臂屈伸白髮遺民幾人在

重來老鶴更精神

蕭條今尚有誰來
老盡荒庭一樹梅
多謝高情肯相遇
衝寒自起埽蒼苔

送李際可婺源學錄

說着瓊臺氣塞胸
天教有子慰孤忠
春秋為喜一經在
兄弟誰知異姓同

乃祖當年洗日功
特書賴有紫陽翁
此邦況是淵源地
好玩遺編振緒風

羯鼓圖

春光一曲透霓屏
紅錦綉中養不廷
誰道青峰白雨點
開元宰相也渠聽

山礬圖

玉殿何勞定等差
弟兄俱是老涪家
季方也與新名字
免得人呼作瑤花

贈東臯講師

飛錫曾聞五臺去
雲間瑞相是耶非
峩眉清現更奇絕

萬里白頭吾未歸

東臯何事守無功
講罷應知萬法空
時枕苔溪作歸夢
臨平一路藕花風

送戚性傳

睢陽書院戚先生綸也名孫侍從臣文物相傳今幾葉
又開講席淑來人

送蕭之剛

旬宣幕府得君重
直到千峰盡處回
聞道棠陰闕

倦書圖

日長偏困校讐人袖手旁觀亦欠伸一覺黑甜酣午枕
絕憐識字苦勞神

誰道春酣雨不禁蒙籠眼色透雲屏著人花氣深於霧
却是三郎睡未醒

題高麗字跡

片紙殷勤贈跋篇來從箕子舊朝鮮六經元不經秦火

好為刊傳惠後賢

毗山之居不皆竹也而其所尚友獨在竹遂擅
此山予觀野約橫陳荆扉半啟小舟找柳下
不覺欣然呼渡徑入萬竹烟霏中山靈頗怪
俗客何自來耶因留詩云

指點山居阿那邊閉門花木養風烟隣人不饌蒼玉束
一一而今欲造天

山人猶未出山時風月雲烟總為詩笑問年來間何闊

此盟應有此君知

右軍書裙帖

戲將墨妙寫烟雲曉起驚呼失素裙盡洗當年羞澁態
從今不比舊羊欣

題四畫

天氣融和凍已開桃花浪暖亦佳哉人生辦取東南尉
底用一雙鸕鷀來

多情宛頸兩駕鴦貪趨湖心錯裏香散髮幽人休盪槳

夜深花露濕衣裳

金颺爭放木夫容蘸影清波分外紅玉立前庭一公子
半標不與俗人同

積雪凝寒不肯融梅花佇立待春風嫩波正比鴨頭綠
厚葉休嗤鶴頂紅

南岳魏監廟裏自請奉祠恬於聲利十餘年來
益閉戶讀易人罕識之余托媚且契比來吳
惠教五絕篤叙故舊情誼藹然用韻復寄不

足酬盛意

人生一世匆匆爾筵秩亡何已旅醉南岳鑪頭芋初熟
等閒知閱幾春秋

誰知白鶴早登門遺墨猶餘屋漏痕師友百年同慧脈
固應自有不云存

全真閉戶魏不琢二紀怡然外世榮留得詩名皮陸集
到君句法有餘清

阿閼離鸞嗟囑耳誰陪老婦祭餅盆二離幸足寬懷抱

共說河汾有外孫

靜探五一共誰論悔不當初逕扣門自笑吾玄今尚白
刻舟空守舊時痕

三禽

何處飛來把修竹數聲圓活夢還驚雨鳩那解知人意
寂莫梨花雨又晴

風裏空餘碧玉柯離離秋子不勝多莫教却向人間語
金井銀牀愁奈何

送恩上人還雲門

當日親曾見珙公如雷辯舌振宗風分明白句句字字是
又向苦川訪病翁

澈師何處覓遺蹤坐聽雲門寺裏鐘正自年來苦行脚
箇中元自有千峰

挽詩

挽楊知府

蜀有古愛直公為令子孫駐原曾婉畫治獄輒平反稿

落榮觀盡紓徐雅道存靈光洞劫火德齒晚彌尊
骯髒羣飛外康強七袞餘者年猶謹禮細字每抄書十
載甘琳館三州奉板輿挂冠天木可雙犧老康廬
見說佳眠食遺身疾自無方期操几杖俄已易床膚久
讀者舊傳仍聯嫁娶圖湘岑望不到灑淚向天隅

挽師叔理

卓爾見成鎸超然驚絕塵形骸脫邊幅肝膈炯精神正
自關天分應難語俗人誰收身後慕雋逸更清新

已飽憂患味方收翰墨勲龍飛新進士猿臂老將軍千里推車軸羣工愧斧斤天乎如有意更為續斯文
四海東坡老平生秦太虛神遊已冥漠坐念更歛歎手
墨看猶濕心期炯未疎堪憐疇昔語腹痛勿驅車

挽趙春谷

墮地追風驥垂天駕海鵬嗟哉中道止藉甚到今稱幾
士待舉火一生甘飲冰居然使跖壽念此拂人膺
子美轉同谷靈均懷此都修名千載短多難一臣孤天

意終難料心期自不渝西風吹更急蕭索閭泉塵
北弁方胥會西崦遽莫追津梁摩詰病臺沿雍門悲鶴
有還家夢烏無反哺期灑岡松櫛近足慰九原思

挽孫太監

埋玉愁聞薤露歌向來耆艾日消磨平生所至棠陰在
晚歲其如麥秀何洛社竟虛同甲會鑑湖應改舊時波
四春手植頃調護萬感今猶憶爛柯

挽陳本齋尚書

在昔實齋老公能繼盛名平生守師說晚歲萃儒榮裡
赦原兵禍臺綱忤物情抽身甬東去騰上幾公卿

天俾公多壽人知道不孤超然一室內不與萬波俱甲
子新詩藁烝嘗舊布襦何妨傳遺老文字照龜趺

挽王厚齋尚書

清要三朝望文章一世榮掌綸誇獨直荷橐表羣英石
室資殫洽金華賴闡明孤臣傷暮景風雨自鷄鳴

開慶言容悅咸淳奏直前每逢時宰怒自保哲人全垂

世三千卷歸田二十年汾亭有遺操獨拍淚潛然
文獻遺諸老風霜魯殿餘斯人不可贖吾道意何如永
念年家好曾聯選部居無繇陪縞送東望淚沾裾

挽陳本齋尚書

有意超塵俗無心愛夕暉勸餐惟屢却持璧竟全歸得
正復奚憾偷生良所非傳家孫子盛端不墜前徽

挽成峩峯

輕舉游帷宅高辭神武門賜湖分老監遺笏付諸孫玉

映神尤朗丹成道自真只應峩頂月萬里照仙魂
吾叔聯姻好當年記漢嘉回頭一甲子遺恨滿天涯尚
喜長庚老俄聞大耋嗟區區論疇昔何處挹蜚霞

挽趙止善

自處若素士不知為貴游多聞每是正寡欲更清修方
借望郎重已深宗國憂嗟哉事竟爾喬木委林丘

昔日三株樹形容頓可驚一癯危獨坐多難失孤擇官
舍煎茶夢天涯裏飯情無由送車後杖淚愧平生

挽親家孟從吾

東野哭其子難存百感身孤孫猶在抱行路亦沾巾滿
目家園樹何時淚葉春諸生為執繩良足化鄉人

挽岳君舉

五十餘年事都將作夢看早方磨鐵硯老遂葬桐棺蟻
結途方戒駒馳歲已闌山前一片石讀者為悲酸

挽姚景春

昔在仙都世人稱善士門丘山嘆華屋風雨長孤根鶴

瘦空餘影鴻冥更斷魂植齋書萬卷喜有外孫存

挽趙碧蘭母劉氏

苗裔真王後儀型老監同庭惟參玉樹氣未感秋蓬衣
制先期具舟藏半夜空故應芳懿在位刻責幽宮

挽張師道

少日追楊晏由來間氣鍾兩科無近比萬里有奇逢正
喜鼇扇重俄驚鵬舍凶輶車方遠稅已見若堂封

在昔台州守先人事分多逋家能記憶上冢每來過老

我病未死送君情奈何賢哉幸有子健翩若雲摩

挽唐學賓

奕世詩書味端知積慶長於人不畦畛為世作津梁肯助魯修泮能令齊發棠陰功天所相食報在諸郎

陵陽集卷六



總校官進士臣胡榮

校對官中書臣吳俊

謄錄監生臣胡觀瀾

欽定四庫全書叢要

集部

陵陽集卷十

七至

詳校官助教臣謝登售



欽定四庫全書

晉書要卷一萬五千九百七十四

集部

陵陽集卷七

元牟巘撰

雜著

喬木亭銘

并序

晉國王公祐手植三槐於庭雖不作王溥官職而其子文正公旦為名宰相孫懿敏公素為名諫官名將帥曾孫鞏蘇文忠公為記三槐堂稱其好學而文以世其家又為作懿敏真贊發明故國世臣之義以為世臣者其

勲烈以著於時德望以服乎人譬之喬木封植之勤養
自拱把以至合抱非一日之故其論懿敏公之父祖子
孫蓋足以當之予倩張模字仲實循王五世孫追維前
烈寶其舊物近又復喬木之亭取蘇文忠公所稱王草定
國者以銘其亭曰

循王甲第吳山之麓勤身事國蟻蝨刀觸而不妄殺一
念純熟三十年間種木繞屋厥木惟喬異彼樸樛爰自
芽蘖以長以育以至拱把合抱連幅忠根義幹積善滌

漉其陰數畱萬世之福我思其人猶愛其木曾是比隣
弗戒樵牧僅逃斤斧容慘神辱維時聞孫有惻心目贖
之以歸天實從欲汎埽其庭雲漲新綠媲美王氏三槐
昂足日有清輝如晞膏沐風有清音如韻琴瑟可娛其
親可庇其族我誦角弓封殖是祝自今伊始公侯必復
萬葉子孫並受穀穀

俞好問摘西銘玉成二字揭之座右俾其子若
孫因名思義克遂有成

天地之心生於萬物其生維何凝沕摧剥薰葭蒼蒼受
變乃成霜露既殺而況在人貧賤憂戚是為福澤德慧
術智是為疢疾增益不能空乏其身於維此意未或不
仁父母於子夫豈不愛歟既愛之曷驕以敗恩之過甚
如飽則傷所以古人教必義方旨哉西銘造化全體惟
好問父以訓其子他山之石攻玉之工物有相假始就
厥功彼粗而厲此溫而密寃其成矣錯落圭璧如琢如
磨君子自修既恂且慄鑄發孔周匪玉其美伊石其力

生成之德

陳玉巖真贊

爾巾猶古爾鬢未斑畫前有易胸次不凡早歲塲屋畧
取二三一旦棄去隱几窮探時乎神遊雙溪之間亦有
負苓相與往還怨而無極肯露機械山空月朗虹貫巖
槃

周公謹贊

儒而俠其非歟墨而隱其幾歟違俗而聱牙玩世而滑

稽歎吾亦不自知或隱几著書或狂歌醉墨是殆見吾
衡氣機也將求之北山之北忽在乎西湖之西然已見
囿于筆墨矣儼幅巾而杖藜

謝竹所歲寒圖

我觀在昔交道實難風雪凌芳衆卉日殫暉乃三友媚
於歲寒松勁梅清綢繆相歡竹亦欣然枝舉葉攢如相
告語晚節是完復有石交竦立巒屹三而四之愈久能
看允矣謝子取友必端顧彼市道慨其永嘆設圖燕坐

銘詩載刊勿渝此盟以鑒以觀

學古齋箴

并序

吾婿張仲實好學者也嘗即其家教授生徒著籍頗衆
束修以養意甚樂而尤與吾鄉鄧善之相友善其之江
陰也善之實繼為之今所謂學古齋者蓋是其處善之
比有遠役此齋復歸張氏程則去蘇實來德孺子箴未
始不同也事彌似其年仲實方念自弛使函溉埽老屋
數椽環以華竹日挾二子開卷其間唔咿聲徹戶外鏘

如鸞鵠學子欣然乃皆來集如其初講肄之暇俯仰千載嘯歌一室自樂其樂書來頗有驕婦翁意余欲扁舟自致以同其樂而未能也夫世有古今學無古今一人已之分霄壤懸絕此乃聖師喫緊為人語然施之數學之室則幾若教人者之為為人而為己者之私為己予疑焉仲實曰今將使教者以為己之心為人學者以為人之心為己若何余曰然何教非學何今非古則為之

箴曰

今人與居戢戢同宇古往之宙庶越而語匪好曷求匪
軌曷御是以君子惟古是慕學古之齋不過環堵我友
寓之子去我處窓明几淨研席有所爰命二子密侍巾
屨亦有來學五合六聚魚雅童貫其進以序執業呻畢
豈不夙莫其教伊何吾行必與非以為已成人之故雖
我有餘不爾閑拒大匠自治為世規矩其學伊何反躬
內顧非以為人成已是務自足于已不外馳騖舍已而
耘何有泰矜惟學惟教惟忠惟恕古人皆然今人則否

絕今不為是謂學古咨爾學者目擊心悟亦惟敬哉我仲實甫

漁父聽琴圖

出緇帷坐杏壇環弟子而琴穆然深思蓋託之文王想見其人漁者何為下船而來持頤以聽既以仁稱夫子猶嘆其苦心勞形而欲語之以所謂真者豈以文王之操其有憂患之心乎故其離世遠害甘終身以隱淪然自居以知道未有真而不仁者也曾餘論之未竟悵莫

駐於擎音

有翅天馬圖

何年塵鏡昏乍洗金背湧出狀怪詭自古空言馬生角
今乃見馬生兩翅恐是渥窪種往往感龍氣龍惟神飛
行天若傳兩翅何足貴想似穆天子會瑤池肉多身重
不得飛一朝乘之逍遙出六合奔風軼電那容追萬里
一息日未旰當時從官無乃疲或云車轍馬迹往往有
如此安用彼翅為徒留誕謫誑後世我願觀者更勿疑

我聞西王母參目而虎首物以類應固宜爾

石上道士閱經圖

石槃槃可容膝山竹亞蘆烟直捐爾書捐爾筆嗒然坐
自納息

昔朱桃椎見高士廉瞪視而其意竟莫傳言固不若不
言之全吾終日言而未嘗言亦不自知其所以然是語
是無以問月川

張季宜像

貌古貌巾凡巾孰知其滿腹下筆如神蓋昔之勇冠軍
而今之老斲輪也可為中國之式席上之珍然且弗屑
方超然企涪翁而挹玄真

畫竹

臨風永嘯劍戟相摩大節凜然正而不阿
玉立娟娟現清淨身匪雨之力本無垢塵
維翠琅玕高拂晴空朝采之發有若長虹

枝葉清潤發此華滋蒙霧之力而不自知

孟集虛像

黃冠野服翛然於大滌天柱無何有之濱吾與之虛而委蛇其虛緣而葆真者歟

四虎圖

藜藿不採林有伏猛其何一日朝無骨鯁

驚雷游雪赴此渴吻下噉清泚有文其炳

顧視有威岩下之電不疾而速風行草偃

畫梅

清香襲人無處可著起視天宇參橫月落
老逋之詩逃禪之筆洞其玉屑忽在吾側

畫貓

剪紅以聘文炳如虎鼠輩疾走莫予敢侮

放鶴圖

放鶴兮林臯澹容與兮蕭騷歛素風而孤矯兮舞空中
之落毛翁在南山南北山北兮羌欲往而從之遨翁曷

為自還兮波粼粼而送輶輶鶴如迎兮乃下翹婉欲止
兮鏘鳴璈噫吾與汝兮猶未離乎天弢數數然肆可迹
兮宇宙雖大將焉逃吾曾不得夫白鷗兮以為曹吾何
意兮客之適與遭吾氣以為馭蓋未嘗去來兮彼延佇
祇徒勞日暮客去但見鶴啄乎空庭兮首下而尻高我
亦嗒然而忘吾兮眇天地其秋毫

故駕部郎中捫膝先生喻公贊

并序

唐時喻亮天寶末從駕狩蜀嘗為陵州守卒官遂家焉

蜀之有喻從此始其俗益蕃大興年氏世通婚姻如古
朱陳人以為美談相膝諱汝礪汝舟則其季也無悶翁
諱崕然皆有文集傳于世越自蜀難先父存齋公與舅
氏名繩先後出蜀舅氏寓太湖之西山蓋隱於橋諸子
亦能自樹立不替家聲昔陶潛嘗作外祖益嘉傳某竊
不自揆援此比為捫膝翁贊當求名筆書而刻之俾後
有攷焉外諸孫牟某讚

蜀有遺直陵陽喻公靖康之末駕部郎中惟國與主已

所願忠陽九百六阨運適逢兩宮北狩外阻內訌金人
偽旨議易宋宗我之百官若盲若聾以次署議屏息厥
恭賊臣邦昌何等妄庸僭干天位自取其亡公于是時
義憤填膺吾膝雖弱與鐵石同誓不少屈以仕楚宮擲
筆徑去矯如驚鴻捫膝之令走卒兒童不肯帝秦自以
為功嗚呼魯連萬夫之雄惟吾捫膝異代同風國有生
氣炎紹再隆揭節諭蜀公來自東一有不合歸卧藁蓬
信意為文大篇春容時乎自寫紙上橫縱奇奇怪怪龍

蛇之蹤而其英烈沖斗貫虹奕葉詩書至無悶翁惟我
祖母慶善夙鍾越至吾母信安肇封謹焉小子敢昧所
從爰述斯讚傳示無窮

贊繆淡圃之祖四訓

繆淡圃以其祖中齋君遺訓積善等四條求予言乃
申述其意以復焉

積善曰 有所為而為善必不力能真積力萬善身一
持忍曰 惟不忍於人乃能忍於己忍者義所為忍過

事堪喜

勤儉曰 勤儉必起家更有為已學進修貴自勉歛退
貴自約

安分曰 人生已分事猶恐不得盡雞豚認隣柵母乃
非吾分 雖然所以行之者一敬而已矣祖訓孔昭淡
圃其懋敬之

欽定四庫全書

舊要卷一萬五千九百七十五

集部

陵陽集卷八

元 爛獻 撰

奏劄

咸淳辛未十二月初一日轉對劄子

臣一介疎賤誤玷周行每竊惟念自先臣子才以來世受國恩至深至厚涓埃未報日懼空官茲者皇帝陛下視朔前殿諸門洞開旦氣清明而臣以此時猥當轉對天光所臨其敢具文以塞故事臣嘗伏讀國史竊觀元

祐三年五月一日蘇軾轉對條陳三事其一條曰唐太宗司門令式云其有無門籍人有急奏者皆令監門與仗家引奏不許關礙祖宗之制自兩省兩制近臣六曹等監長貳有所欲言及典大藩鎮奉使一路出入辭見皆得奏事殿上其餘小臣布衣亦時特賜召問非獨以通下情知外事亦以考察羣臣能否情偽非苟而已伏望更與大臣商議除臺諫開封知府已許上殿外其餘臣僚舊制許請間奏事及出入辭見許上殿者皆復祖

宗故事元祐六年八月一日范百祿轉對亦條陳三事
其一條曰太祖皇帝建隆三年詔自今每五日內殿起
居翰林學士及文班常轉官轉對既又命尚書省集官
議其可者而行之真宗皇帝詔有司錄轉對章疏一本
留中祖宗之於轉對其勤且至如此今一歲之中侍朝
者有數臣僚每次二員轉對不過十餘人借使人悉知
而言言皆見用亦不過十數事耳望詔執事審議轉對
之制悉由太宗真宗舊章二臣之言大抵因轉對以通

下情以廣上意而已臣嘗謹心攷觀元祐五六間大
小之臣類無不得其言者或入見上十事或經筵陳三
劄此言及君德者也或議差役或爭四河此言及政事
者也或言陝西地震或言冬溫不雪或言日食六分之
變此言及灾異者也或十九疏論章惇或十三疏論蔡
確或十數論安燾此言及小人者也或乞免浙西五穀
力勝錢或乞蠲放戶部餘剩錢或乞取常平敕令刪為
一書且放秋成收糴斗斛此言及民事者也或乞照寶

元慶歷令內侍省取先朝帳籍比較近年用度之數或
言奉宸庫已取珠子六十斤戶部已用金三千六百兩
此言及節用者也禁中求乳母則劉安世等言之內中
朱紅車子亂行則蘇軾劾之其言及宮闈者如此皇太
后親屬向宗良知邢州則蘇轍言之皇太后親屬撲斷
酒務少欠官屬錢均作七年送納則曾肇等言之其言
及戚畹者如此隨龍馮宗道遷轉則王岩叟言之內批
錢班幹當牛羊司劉言幹當翰林司則曾肇言之一宋

用臣敘復中州刺史則范祖禹以為官寺興土木不可以復用一陳景元校黃本道書則范祖禹又以為異端虛誕不可以成宗夫其一時更進迭諫議論已有餘并包兼容聽受已甚美而臣軾臣百祿猶惓惓以復舊制議轉對為言豈過計哉忠言利行固不厭其多王道利宣固不嫌其廣也伏惟皇帝陛下作其即位於今八年凡其所建植施置壹是皆以元祐為的而聽言一事尤極謙隆初元詔書盡復祖宗舊制間因臣僚避對則又

戒飭申嚴導人使言固已無所壅蔽乃自比歲賴異流傳皆謂諸臣進言稍有忤拂聖意厭憚玉色弗怡或顧左右而言他或視屋雷而不答人臣犯顏逆耳本為難事藉令未能施用奈何更加沮傷遂使循默成風此豈盛世宜有我朝以言立國列聖相傳未嘗罪一言者雖中更大拂亂大傷敗而社稷之長久終有賴于人言然則人言何負於國倘陛下不察徑銷廢之志士忠臣寧不為之解體況外而邊事缺孔而陰邪伺隙日食不見

天且忘予而入冬過燠寒氣未效其何以興來歲寇魃
相挺或能勝予而豐歲且然脫有水旱其何以善其後
惟有一綫言脈所當極意扶持今日果已盡如元祐則
聽言之法固當益循于元祐今日或未盡如元祐則聽
言之法尤當百倍于元祐陛下試取元祐諸臣之論奏
與夫愚臣前者之條陳蝮瀆燕閒特賜觀省聖明之意
必將有慨於中其繼自今益恢聖聽毋疑其歸過而賣
直毋嫌其立異而要名凡有苦口之言率皆虛心以致

其懇直惄忱者則欣然容受其忠實有補者則立見施行或者偶非其人則他山之石可以攻玉不當以人而廢言或皆無可采則川澤納污山藪藏疾亦當容之而勿問庶幾聽言之美一與元祐同符天下幸甚臣於二臣無能為役特援轉對之比以寫憂愛之私干冒天威惟陛下幸赦狀

乾會節進銀狀

武岡

彌月不遲於赫一人之有慶任土作貢丕昭萬國之來

朝上件銀品列於金英生於石地不愛寶式彰萬億年之休天用降康誕受九五福之壽

申省乞祠狀

某本以濶疎加之閭劣荷明時曲矜於先緒而大造不棄於微蹤擢之於患難之餘畀之以民社之寄蓋亦自知其非據猶欲少報于殊私領事以來盡力所至雖一毫未有於實惠而千里或諒其苦心顧以資淺望輕平時不足以鎮壓數奇命薄所至輒值于艱虞妖雖人興

咎將誰執何敢效相尤之語但知為自治之規賴廟朝
遠揚于德威幸封境獲清于旬浹有如旁郡之元惡亦
為多方而悉擒尚藉覆存未聞觸罷茲遂書於下考正
當免于後圖外則障蔽客邪內則補治元氣必得精神
強調之吏庶無歲月玩愒之風重念某鼠技已窮馬力
既竭況以跨年之久病凜乎末路之難全深恐疾顛有
辜墮使敢據真憫上瀆公朝欲乞矜憐特賜敷奏縱未
加于顯黜願並畀以閒祠得稍遂休息之私實仰拜生

成之德

辭免除浙東提刑狀

除委驟加愚衆增惕伏念某素無能解見謂迂疎自汙
省戶之華居慚玩愒比籲祠官之請實出忱真蓋深懼
于踰涯惟必期于從欲俄蒙簡擢躉界臬司惟外臺之
寄最嚴而左翊之區至近地大物博岸獄頗滋人微望
輕風稜何有況復侵于多病亦欲遂於稍休敢乞公朝
特賜敷奏收回成煥謹恐祥刑或未棄于微踪尚改畀

于小壘庶可效涓糜之力茲允謂生成之恩

申省乞祠狀

某藐爾辱膺誤蒙獎拔平生夢想豈望臺郎旦夕馳驅
况在甸服固知極難于稱塞有欲少効于疲鶩逮此彌
年居然憫日既不能悉聰明智慮坐蔽于獄成又不能
體疾痛癢疴力伸于民隱振揚何有仇怨已多良以物
望之輕祇為明指之玷載惟弱質每覺早衰自夏秋以
訖冬率苦病而寡懽况心力必凋意緒怔忡無非親齋

居之時固已積曠療之咎前奏力祈于夙退庶幾少逭
於疾顛自墮因循第增愧惕茲幸書于下考其敢昧於
初心是用力控微忱上干鈞造欲望察其真切賜以敷
陳特賦祠官俾安愚分別遴時望以重職司誓殫香火
之勤仰答乾坤之施

武岡置靖安寨申省狀

本軍雖為僻壘然西通融桂北控沅靖南連全永家與
溪洞相聯舊來節次於要害去處置立堡塞控扼防扎

無慮十五六而後猶省各安武岡一邑雖地無溪洞而
紫陽鄉都分最濶去軍縣且二百餘里其俗頑獷又與
永邵接境往往惡少之所出沒迺無廵寨以為彈壓戊
辰妖寇相挺嘯聚無所控制幾至猖獗本軍隨宜招捕
仰賴聖朝威德隨得弭寧事定之餘儻又不知防守非
所以懲前事而毖後患也某雖僥倖替去然不敢不為
此邦長久之慮昨差官相度下育渡乃紫陽鄉要害之
地遂行創立寨屋三十餘間及寨官衙守等皆是本軍

自行措辦一毫不以擾民並已齊備了畢今來欲以靖安寨為名招刺寨軍一百人駐扎防守見將標釘到已斷妖賊周千四等及其餘妖徒田產盡行籍入本寨充養軍之費或尚支用不敷在本軍隨時那融應付其契勘得本官舊有武陽寨監押一員併同管轄一員闕官歲久欲乞公朝敷奏將上件二闕省罷特置知靖安寨兼巡檢一員專任武岡縣紫陽長溪兩鄉防扎之責仍下吏部作闕許經任人差注或從本軍選辟一名庶幾

此寨既建可以聯接聲勢禁伏姦暴千里均拜安靖之
福實為利便

冊大禮例庫申省狀

本軍每遇大禮例進奉銀二千二百十一兩一錢四分
隨綱別進奉銀三百八十四兩五錢二分五釐所有價
錢係照指揮截撥及剗刷雜色窠名應副外尚且不敷
舊來弊例或數之質庫墟戶或數之軍縣吏胥甚至有
告訐獻助之名本非得已而吏緣姦重貽民害質庫墟

戶之往往停閑以避科買市井蕭然日甚一日某曩歲
抵軍詢知此病應詞訴並不許告訐獻助而它未能區
處也緣本軍以縣為軍賦入有限兼因妖寇調發官軍
民兵為費不貲某不敢以一錩一粒科擾百姓自行那
融應辦皆出於常年調度之外郡計愈見單窘無可措
畫遂痛行撙節浮費及供給等錢銖積寸累計見錢一
萬貫者創置大禮銀綱貼助解庫一坐月收微息專一
樁管不許移動無遇大禮年分收買兩項進奉銀兩除

久例截撥剗刷錢外將本軍三年所積息錢支出添助
上件銀兩價錢咸淳八年明堂大禮為始大約可增錢
六千四百餘貫者比之目今市價畧同在民可無倍費
庶幾稍草科配獻助等弊田閭之間生意初回務以仰
稱聖朝嚴恭大禮不瀆不擾之意本軍除以節次施行
外所合具申公朝欲乞劄下本軍照應永為無窮之利

祈雨未獲申諸司狀

本軍今歲苗稼茂盛但自六月以來一向缺雨高下之

田率皆告病早稻抽穗者亦多焦卷連日祈求雖四郊
間有得雨去處却未沾足萬人之命一年之計決此數
日雖已多方疎剔獄訟講行寬恤如諸牢囚繫勘酌疎
放合催錢物等第寬減外切念謬政致萬實為守者之
罪豈容恬然自處謹蔬食閑閭自省應出入並用小轎
儀物後樂並省少見身自貶削之意仍備申諸臺乞賜
申奏將某罷黜以謝千里之民

表

賀乾會節表

陽居大夏實符炎運之興德為聖人爰記虹流之瑞
亨嘉之會福祿攸同

中賀

恭惟皇帝陛下祗適駿猷

丕釐惠命文宜多子共知有道之長漢舉高年尤欲
及人之老時萬時億之德之純臣幸際昌期阻陪賀
列周而復始泰元願神矣之增聲無不宜天保效南
山之祝

賀壽崇節表

至哉坤元乃順承天誕彌厥月于其王母受茲介福于
萬斯年慶輯無疆歡生有感中賀恭惟壽和皇太后陛下

下儉慈是寶恬澹無為在太極先自見兩儀之運以天
下養生膺五日之朝瑞節相宣瑤觴胥憚臣欣逢華旦
越任黔邦聽長樂之嚴鐘莫陪鳴玉增泰元之神筭復

見循環

浙東提刑到任謝表

右銓暢日方自恩于鶴梁左翊觀風俾載馳于駟轡寵

光鳥奕感激輪囷

中謝

惟民之生皆天所命本無不善

何有于刑自後世尊用司空城旦之書故斯人浸迷闕
睢麟趾之意然則臬事亦重矣安得仁者以司之禁於
未然輔所不及矜畀庶戮必深識聖人不獲已之心明
清單辭類皆非俗吏所能為之事盍咨淑問庸受嘉師
伏念臣見謂謗能粗承忠教帶衡佩矩僅守曲士之尋
常錯節盤根初蔑良工之剖劂荷曲予于先緒每加錄
于後蹤出領州麾專城良忝入洿省戶典選何裨自知

稱塞之難願循止足之分俞音汔閱誤渥更加叨乘使
傳之華越在帝鄉之近然而地大物衆曷諏度之能周
人微望輕于振揚乎奚有覺鉛刀之甚鈍懼繡斧之莫
勝視事云初撫躬增惕茲蓋恭遇皇帝陛下好生如舜
克寬若湯得位曰仁式廣天地之大德措刑不用方臻
帝王之極功爰重職司以嚴甸服臣敢不明謹于獄殫
既厥心迪禮樂而有光愧曷當于華選畫衣冠而不犯
惟仰贊于盛時

謝告奏

將命俯臨贊書申錫寵臨所被戴捧奚堪恭惟皇帝陛下體念臣工患綏畿服訓詞至厚蓋有三代之風威嚴在前不違咫尺之地綸音所逮節瑞以光臣自愧微蹤驟膺隆使維丕顯休命何以對揚監于茲祥刑尚思勉厲

賀明堂慶成表

度九尺之筵稱秩元祀歌萬年之頌申命用休慶衍宗

祐澤流函夏

中賀

恭惟皇帝陛下齋莊中正寅畏嚴恭

式彰致美之忱菲食如禹聿嚴昭事之德卑服即文宜
迄用于肇禋而畢來于諸福臣濫將隆擢幸際昌辰宮
廟駿奔莫贊聲明之盛邦家燕祉益祈運祚之長

賀皇太后表

世室合祛肇成熙事東朝介福喜溢慈顏萬國咸歡兩

宮交賀

中賀

恭惟皇太后陛下功高保佑德備徽柔肅

在廟之忱此思齊所以聖等如山之壽曰天保莫不增

屬載舉于縟儀庸茂迎于景覲臣親逢盛旦濫玷使華
燕及皇天繁祉願綏于文母于彼原隰懼謠樂聽于堯
民

賀皇后牋

禮嚴上帝于皇旒璪之儀美萃中宮爰贊玉盤之祀萬
方禔福三殿均懽中賀恭惟皇后殿下文定厥祥采嘉
維則夙有家而警戒孝敬相成茲在廟而肅雖徽音是
嗣贊今日王猷之盛踵我朝后德之賢臣拭目邦榮糜

身外服秉文顯相莫陪多士之聯移俗厚倫共美二南之化

謝赦表

熙事備成禮嚴三載慶條敷宥和暢九垓聖澤流行嘉生歡憚中謝恭惟皇帝陛下寅恭饗帝忠厚承家神感

至誠已聿懷于多福邦有大賚用斂錫于庶民開釋無辜薰蒸極治臣初將隆指即奉寬書湯網闊疎咸識自新之路呂刑明恤益宣不殺之仁

賀壽崇節表

四月維夏日行南陸之長八千為春天錫東朝之壽宮
聞輯慶海宇均懽中賀恭惟皇太后陛下秉德靜專游

神恬澹詩歌震夙生民時維姜嫄易用正中介福于其

王母穀旦相先於嘉會藻旒親奉於怡愉臣幸際昌期
敬衷善頌近畿持節莫陪長樂之儀廣內稱觴第想瑤

池之集

賀乾會節表

歲在壽星爰紀誕彌之節陽居大夏況逢長養之辰華
渚流光寰區輯慶

中賀

恭惟皇帝陛下聰明天縱聖敬

日躋億載怡愉方奉稱觴之樂四方綏靖自臻磐石之
安于萬斯年既多受祉臣欣逢盛際敬輯頌聲自慚周
雅之使臣阻陪在列願與帝鄉之父老仰祝殊齡

陵陽集卷八